



## Extrait de la revue **SingulierS** du 4<sup>ème</sup> trimestre 2012

Revue des parlers romans de la province de Luxembourg

Editeur responsable: P. Otjacques, rue de la Hette 19 - 6840 Neufchâteau

**Rubrique : Éditorial**

### Lu Muzée su Internet

L' anêye dès 30 ans du Muzée dul Parole an Ardène èst oûte. On s' è souvèrè, ca mwintes organisâcions on sté mètûes su pîd èt elle ont sté tourtoutes dès rèveussites. Mèrci brâmint dès cômps a vous-ôntes !

Elle ont sté adon l' ocâzion d' rascontrer èt d' fiêster avu praticmint toutes lès djins ki wèyèt vlètî l' walon d' prêt û d' lon dins l' Ârdène èt la grande contrêye. Lès rcôzeûs, lès copineûs, lès lîjeûs, lès scrîjeûs, lès tchanteûs, lès conteûs, lès ârtisses, ... Nolu n' è sté rovié !

La tévé nous-è fwêt ossi l' oneûr du moustrer lès djins du *Musée de la Parole en Ardenne* pa cate cômps : deûs chîjes a « Walon nous » èt deûs rportadjes su TVLux. RTBF la Trois avot d' abônrd invité Michel Francard et Joël Thiry ô prétemps pou côzer dès lîves et dès-ôntes organisâcions du Muzée ; pîs elle è invité lès « Tchanteûs d' après mèynut' » a l' arîre sêzon. TVLux è présanté noste ovradge al présantâcion d' nosse candidature pou lès Godefroid ; pîs ou mwès d' octômbe, c' èst l' cabarèt dès 30 ans k' è passé al tévé d' noste province. Dj' ôrans du mô fwêre mî dins lès-anêyes a vnu, pari !

C' èst l' moumint ossi du s' souvnu dès djins k' ont ovré avu nous-ôntes, ou comitî, come scrîjeûs û come binvlant. Gn-è co kékes inks k'ont ralé ç't-anêye ci, mès dju l'zî rindans omâje a tourtous èt dju pinsans a zês.

Tous lès dîj ans, lu Muzée dul Parole bouche in bon cômp, èt saye du toudi s' modèrnizer, du monter d' èn-apas dins la rcounchance du l' ovradge pa tourtous. Grâce a Christian Antoine, yink du nôns mimbes du Rindeûs, lu « *Site internet* » du Muzée è vnu ô monde a l' arîre sêzon. On-z-î troûve toutes lès-informâcions su l' ovradge, lès lîves, lès ôteurs, lès dates des manifèstâcions... Tapez [www.musedelaparole.be](http://www.musedelaparole.be) ! Èt vous sôrez t't-afwêt !

**Pierre OTJACQUES**